

Trefniadau ar gyfer Comisiynu Gwasanaethau – Cyngor Powys

Blwyddyn archwilio: 2023-24

Dyddiad cyhoeddi: Mehefin 2025

Cyfeirnod y ddogfen: 4913A2025

Paratowyd y ddogfen hon fel rhan o waith a gyflawnir yn unol â swyddogaethau statudol.

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi.

Mae'r ddogfen hon hefyd ar gael yn Saesneg. This document is also available in English.

Cynnwys

Adroddiad cryno	
Pam y cynhaliom ni'r archwiliad hwn	4
Ein dyletswyddau archwilio	4
Ein hamcanion ar gyfer yr archwiliad hwn	4
Pam fod comisiynu'n bwysig	4
Yr hyn y gwnaethom fwrw golwg arno a sut y mae da'n edrych	5
Ein dulliau archwilio a phryd y cynhaliom ni'r archwiliad	5
Yr hyn a ganfuom	6
Ein hargymhellion i'r Cyngor	9
Atodiadau	
Atodiad 1 – cwestiynau a meini prawf archwilio	10

Adroddiad cryno

Pam y cynhaliom ni'r archwiliad hwn

Ein dyletswyddau archwilio

- 1 Rydym yn cynnal yr archwiliad hwn dan y dyletswyddau sydd wedi eu cynnwys yn:
 - adran 17 Deddf Archwilio Cyhoeddus (Cymru) 2004 (Deddf 2004) i helpu i alluogi'r Archwilydd Cyffredinol i fod wedi'i argyhoeddi (neu beidio) bod y Cyngor wedi sefydlu trefniadau priodol i sicrhau gwerth am arian o ran y modd y mae'n defnyddio ei adnoddau; ac
 - adran 15 Deddf Llesiant Cenedlaethau'r Dyfodol (Cymru) 2015 i helpu i alluogi'r Archwilydd Cyffredinol i asesu i ba raddau y mae'r Cyngor yn gweithredu yn unol â'r egwyddor datblygu cynaliadwy wrth gymryd camau i gyflawni ei amcanion llesiant.
- 2 Gall yr archwiliad hwn oleuo astudiaeth ar gyfer gwella gwerth am arian dan adran 41 Deddf 2004 hefyd.

Ein hamcanion ar gyfer yr archwiliad hwn

- 3 Ein hamcanion ar gyfer yr archwiliad hwn yw:
 - darparu sicrwydd bod gan gynghorau drefniadau priodol ar gyfer comisiynu gwasanaethau i sicrhau gwerth am arian o ran y modd y maent yn defnyddio adnoddau;
 - darparu sicrwydd bod cynghorau'n gweithredu yn unol â'r egwyddor datblygu cynaliadwy wrth gomisiynu gwasanaethau; ac
 - egluro sut y mae cynghorau'n mynd ati i gomisiynu gwasanaethau ac ysbrydoli a grymuso cynghorau a chyrff eraill yn y sector cyhoeddus trwy adnabod a rhannu enghreifftiau o arfer/dulliau nodedig lle y bo'n berthnasol.
- 4 Rydym yn cynnal yr archwiliad hwn ym mhob un o'r 22 o brif gynghorau yng Nghymru.

Pam fod comisiynu'n bwysig

- 5 Comisiynu yw'r broses a ddefnyddir gan y Cyngor i ddylunio gwasanaethau y mae'n bwriadu eu darparu. Mae'n dechrau â diffinio'r gwasanaeth a'r allbynnau a deilliannau a ddymunir ac yn diweddu pan fo'r Cyngor yn trefnu ei ddull darparu. Er enghraifft, trwy sefydlu tîm darparu yn fewnol, neu drwy gaffael cyflenwr allanol.
- 6 Gall trefniadau comisiynu helpu i sicrhau bod gwasanaethau'n cael eu darparu mewn modd darbodus, effeithlon ac effeithiol. I'r gwrthwyneb, gall gwendidau mewn trefniadau comisiynu leihaus effaith gwasanaethau a'u gwerth am arian, hyd yn oed os yw'r prosesau sy'n dilyn, megis caffael a rheoli contractau, yn gadarn.



Yr hyn y gwnaethom fwrw golwg arno a sut y mae da'n edrych¹

- 7 Fe wnaethom adolygu trefniadau'r Cyngor ar gyfer comisiynu gwasanaethau ac yn benodol i ba raddau y mae hyn wedi cael ei ddatblygu yn unol â'r egwyddor datblygu cynaliadwy; ac y bydd yn helpu i sicrhau gwerth am arian o ran y modd y defnyddir adnoddau'r Cyngor.
- 8 Nid oedd yr archwiliad hwn yn cynnwys trefniadau caffael na threfniadau rheoli contractau'r Cyngor.
- 9 Roedd yr archwiliad yn ceisio ateb y cwestiwn cyffredinol hwn: **Wrth gomisiynu gwasanaethau, a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?**
- 10 Fe ddefnyddiom ni'r meini prawf archwilio a nodir yn **Atodiad 1**, sydd hefyd yn dangos y berthynas rhwng y meini prawf a'r cwestiynau archwilio. Goleuwyd hyn gan ein gwybodaeth gronns yn ogystal â'r hierarchaeth gwestiynau a dangosyddion cadarnhaol yr ydym wedi'u datblygu i ategu ein harchwiliadau o gymhwyso'r Egwyddor Datblygu Cynaliadwy.



Ein dulliau archwilio a phryd y cynhaliom ni'r archwiliad

- 11 Mae ein canfyddiadau'n seiliedig ar adolygiadau o ddogfennau, a chyfweliadau gyda'r uwch swyddog(ion) sy'n gyfrifol am ddatblygu dull comisiynu strategol y Cyngor. Fe wnaethom hefyd gyfwrdd ag uwch swyddogion â chyfrifoldeb am wasanaethau y mae'r Cyngor wedi'u comisiynu'n allanol.
- 12 O ystyried yr ystod eang o wasanaethau sydd gan y Cyngor, fe wnaethom brofi sampl o'r trefniadau y mae'r Cyngor wedi'u sefydlu i gomisiynu gwasanaethau. I wneud hyn, fe ddewisom ni nifer o wasanaethau lle mae'r Cyngor wedi penderfynu comisiynu gwasanaethau'n allanol ac fe archwiliom ni'r trefniadau comisiynu y mae'r Cyngor wedi'u rhoi ar waith. Y sampl o feysydd gwasanaeth y gwnaethom eu hadolygu yn y Cyngor oedd:
 - Gwasanaethau Cymorth i Deuluoedd
 - Gwasanaethau Bysiau
- 13 Mae'r dystiolaeth yr ydym wedi'i defnyddio i oleuo ein canfyddiadau'n gyfyngedig i'r ffynonellau hyn. Fe wnaethom y gwaith hwn rhwng mis Hydref 2024 a mis Chwefror 2025.

¹ Fe'i diffinnir fel 'yr hyn a ddylai fod' yn ôl deddfau neu reoliadau, 'yr hyn a ddisgwylir' yn ôl arfer gorau, neu 'yr hyn a allai fod', pe bai'r amodau'n well.

- 14 Rydym yn gwneud y gwaith hwn ym mhob un o'r 22 o brif gynghorau yng Nghymru ac, yn ogystal ag adrodd yn lleol wrth bob cyngor, rydym hefyd yn bwriadu cynhyrchu adroddiad cenedlaethol.



Yr hyn a ganfuom

- 15 Ar y cyfan, canfuom nad oes gan y Cyngor drefniadau i'w sicrhau ei hun ei fod yn gyson yn sicrhau gwerth am arian wrth gomisiynu gwasanaethau. Fodd bynnag, canfuom fod rhai elfennau allweddol o drefniadau yn eu lle mewn rhai meysydd gwasanaeth. Rydym yn nodi isod pam y daethom i'r casgliad hwn.
- 16 Mae holl wasanaethau'r Cyngor, ni waeth beth fo'r mecanwaith darparu, yn cael eu comisiynu. Nid oes gan y Cyngor ddull comisiynu corfforaethol cyson. Yn lle hynny, mae'n dibynnu ar feysydd gwasanaeth i lunio trefniadau priodol.
- 17 Roedd y Cyngor wedi diffinio ac egluro'r angen am y sampl o wasanaethau wedi'u comisiynu a adolygwyd gennym ni. Roedd hefyd wedi nodi deilliannau bwriadedig y gwasanaethau. Fodd bynnag, nid yw trefniadau corfforaethol y Cyngor yn ei gwneud yn ofynnol i feysydd gwasanaeth ddiffinio na nodi pam fod angen gwasanaeth a gomisiynir. Mae nodi rhesymeg dros wasanaethau a gomisiynir a'r deilliannau y maent wedi'u bwriadu i'w cyflawni'n bwysig, i alluogi'r Cyngor i asesu a monitro i ba raddau y mae'n cyflawni'r deilliannau hynny ac felly'n darparu gwerth am arian.
- 18 Nid yw'r Cyngor yn ei gwneud yn ofynnol i feysydd gwasanaeth nodi sut y bydd gwerth am arian gwasanaethau a gomisiynir yn cael ei asesu a'i fonitro. Dim ond un o'r gwasanaethau a adolygwyd gennym ni sy'n casglu mesurau deilliannau chwarterol ac astudiaethau achos sy'n ei alluogi i fonitro ei effaith. Trwy beidio â sicrhau ei fod wastad yn nodi sut y bydd gwerth am arian gwasanaethau a gomisiynir yn cael ei asesu a'i fonitro, mae'n anodd i'r Cyngor ei sicrhau ei hun ei fod yn mynd ati'n rheolaidd i sicrhau gwerth am arian.
- 19 Nid oes gan y Cyngor drefniadau i sicrhau ei fod yn mynd ati'n systematig i gynnal arfarniadau cynhwysfawr o'r opsiynau wrth gomisiynu gwasanaethau. Nid yw'r Cyngor yn ei gwneud yn ofynnol i feysydd gwasanaeth gynnal arfarniad cynhwysfawr o'r opsiynau cyn dewis sut y bwriedir darparu gwasanaeth. Canfuom mai dim ond un o'r gwasanaethau a adolygwyd gennym ni oedd wedi cynnal arfarniad o'r opsiynau. Golyga hyn na all y Cyngor fod wedi'i sicrhau ei fod wastad yn ystyried yr holl opsiynau ar gyfer darparu gwasanaethau i sicrhau'r gwerth gorau am arian. Mae hyn yn arbennig o bwysig ar adeg pan fo'r Cyngor yn profi heriau ariannol sylweddol² ac yn bwriadu cynnal rhaglen sylweddol o benderfyniadau comisiynu trwy ei Raglen Powys Gynaliadwy.
- 20 Nid yw trefniadau'r Cyngor yn ei gwneud yn ofynnol i feysydd gwasanaeth ystyried taro cydbwysedd rhwng anghenion byrdymor uniongyrchol ac anghenion tymor

² Archwilio Cymru, Adolygiad o Gynaliadwyedd Ariannol Cyngor Powys, Tachwedd 2024

hwy wrth gomisiynu gwasanaethau. Serch hynny, gallai'r ddau wasanaeth a archwiliom ni ddangos eu bod wedi ystyried sut y byddent yn taro cydbwysedd rhwng anghenion byrdymor ac anghenion tymor hwy. Ond trwy beidio â sicrhau bod hyn yn digwydd yn systematig ar draws yr holl feysydd gwasanaeth wrth gomisiynu gwasanaethau, mae'r Cyngor yn cyfyngu ar ei sicrwydd bod gwasanaethau'n sicrhau gwerth am arian.

- 21 Nid yw'r Cyngor yn ei gwneud yn ofynnol i feysydd gwasanaeth nodi goblygiadau ariannol darparu gwasanaethau dros y tymor canolig a hwy (costau oes gyfan) fel rhan o'i drefniadau comisiynu. Fodd bynnag, roedd y meysydd gwasanaeth a adolygwyd gennym ni'n gallu dangos eu bod wedi ystyried costau oes gyfan penderfyniadau comisiynu. Roeddent hefyd wedi nodi sut y byddent yn ymateb pe bai cyllid ar gyfer y gwasanaethau'n lleihau yn y dyfodol. Mae ystyried goblygiadau hirdymor a goblygiadau byrdymor penderfyniadau comisiynu'n gallu helpu'r Cyngor i osgoi dulliau comisiynu nad ydynt yn sicrhau gwerth am arian dros y tymor hwy.
- 22 Nid yw trefniadau'r Cyngor yn ei gwneud yn ofynnol i benderfyniadau comisiynu gael eu goleuo gan gysylltiadau â'i flaenoriaethau strategol ei hun, blaenoriaethau strategol sefydliadau eraill yn y sector cyhoeddus a'r nodau llesiant cenedlaethol. Roedd y gwasanaethau a adolygwyd gennym ni'n gallu dangos sut y maent yn cyfrannu at amcanion llesiant y Cyngor a sefydliadau eraill yn y sector cyhoeddus, yn ogystal â'r nodau llesiant cenedlaethol. Fodd bynnag, dim ond ar ôl i'r penderfyniad gael ei wneud i gaffael gwasanaeth gan ddarparu'r allanol y mae trefniadau'r Cyngor ar gyfer hyn yn cael eu rhoi ar waith. Gall sicrhau bod goblygiadau ehangach yr holl benderfyniadau comisiynu'n cael eu hystyried yn systematig fel rhan o drefniadau comisiynu helpu'r Cyngor i osgoi dyblygu ac adnabod manteision lluosog i wella deilliannau a gwerth am arian.
- 23 Nid yw'r Cyngor yn ei gwneud yn ofynnol i feysydd gwasanaeth adnabod pwy yw'r bobl iawn i'w cynnwys wrth ddylunio gwasanaethau. Fe wnaeth un o'r gwasanaethau a archwiliwyd gennym ni ymgysylltu â defnyddwyr gwasanaethau, ond dim ond ar ôl i'r penderfyniad i gaffael y gwasanaeth gael ei wneud. Roedd y gwasanaeth arall a archwiliwyd gennym wedi ymgysylltu â defnyddwyr y gwasanaeth fel rhan o'r broses gomisiynu. Trwy beidio â chynnwys amrywiaeth lawn y rhai y mae penderfyniadau comisiynu'n effeithio arnynt bob amser wrth ddylunio gwasanaethau, ceir risg y bydd y Cyngor yn darparu gwasanaethau nad ydynt yn diwallu anghenion ei gymunedau neu na fydd yn sicrhau gwerth am arian.
- 24 Nid yw'r Cyngor yn ei gwneud yn ofynnol ystyried pa bartneriaid allai'r meysydd gwasanaeth weithio gyda hwy i gomisiynu gwasanaethau. Nid yw'r Cyngor wedi cynnal dadansoddiad o bartneriaid posibl fel rhan o'r broses gomisiynu ar gyfer unrhyw un o'r meysydd gwasanaeth a archwiliwyd gennym ni. Trwy beidio â sicrhau ei fod yn ystyried yr ystod lawn o bartneriaid posibl yn systematig, ceir risg bod y Cyngor yn colli cyfleoedd i wella gwerth am arian trwy, er enghraifft, rhannu arbenigedd, capasiti ac adnoddau.
- 25 Gan nad oes gan y Cyngor ddull comisiynu corfforaethol cyson, ni all fynd ati'n rheolaidd i adolygu gwerth am arian ac effeithiolrwydd ei ddull. Gall adolygu

effeithiolrwydd ei drefniadau comisiynu'n rheolaidd helpu'r Cyngor i adnabod cyfleoedd i wella eu heffeithiolrwydd a'u gwerth am arian.

- 26 Nid oes gan y Cyngor drefniadau i sicrhau bod gwersi a ddysgwyd o weithgarwch comisiynu'n cael eu hadnabod a'u rhannu fel rhan o'r drefn arferol. Mae rhannu gwersi a ddysgwyd ar draws y Cyngor yn bwysig oherwydd er bod rhai gwasanaethau'n gwneud llawer o gomisiynu allanol, mae meysydd eraill yn y Cyngor yn llai profiadol.

Ein hargymhellion i'r Cyngor

Arddangosyn 1: ein hargymhellion i'r Cyngor

Argymhellion

A1 Sefydlu trefniadau comisiynu

Dylai'r Cyngor sefydlu trefniadau i'w sicrhau ei hun bod penderfyniadau comisiynu'n cael eu siapio'n gyson gan y canlynol:

- dealltwriaeth am y gwasanaeth sydd i'w gomisiynu a'r deilliannau bwriadedig (Para 17);
- nodi sut y bydd yn asesu ac yn monitro gwerth am arian (Para 18);
- arfarniad o'r holl opsiynau i ddarparu'r gwasanaeth o safbwynt darbodaeth, effeithlonrwydd ac effeithiolrwydd dros y tymor byr a hwy (Para 19);
- cynllunio dros raddfa amser briodol (Para 20);
- dealltwriaeth am y goblygiadau hirdymor o ran adnoddau (Para 21);
- sicrhau bod effeithiau ehangach gwasanaethau a gomisiynir yn cael eu hadnabod a'u cynyddu i'r eithaf (Para 23);
- cynnwys y bobl a'r partneriaid iawn i ddylunio a darparu'r gwasanaeth (Para 24); a
- rhannu gwersi ar draws y sefydliad (Para 26).

A2 Sicrhau y cydymffurfir â'i drefniadau comisiynu

Er mwyn sicrhau bod dull comisiynu corfforaethol y Cyngor yn cael ei roi ar waith, dylai'r Cyngor gyflwyno trefniadau i fonitro'r modd y cydymffurfir ag ef.

A3 Cyflwyno adolygiad rheolaidd o drefniadau comisiynu'r Cyngor

Er mwyn sicrhau bod y Cyngor yn adnabod cyfleoedd i wella gwerth am arian, dylai fynd ati'n rheolaidd i werthuso effeithiolrwydd ei drefniadau comisiynu corfforaethol.

Atodiad 1

Cwestiynau a meini prawf archwilio

Cwestiwn cyffredinol: Wrth gomisiynu gwasanaethau a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?

Cwestiynau Lefel 2	Cwestiynau Lefel 3	Meini Prawf
A oes gan y Cyngor resymeg eglur dros gomisiynu gwasanaethau?	A yw'r Cyngor yn diffinio'n glir pa wasanaethau y mae'n bwriadu eu comisiynu a pham?	• Mae'r Cyngor yn nodi diffiniad clir o'r gwasanaethau y mae'n bwriadu eu comisiynu • Mae'r Cyngor yn nodi 'pam' fod arno angen comisiynu'r gwasanaethau gan gynnwys: – effaith/deilliannau bwriadedig darparu'r gwasanaeth – a fydd/sut y bydd y gwasanaeth yn helpu'r Cyngor i gyflawni ei ddyletswyddau statudol
	A yw'r Cyngor yn cynnal arfarniad cynhwysfawr o'r opsiynau comisiynu cyn penderfynu comisiynu gwasanaeth?	• Mae'r Cyngor yn ystyried yr ystod lawn o opsiynau comisiynu ar gyfer darparu'r gwasanaeth – gallai'r opsiynau gynnwys y canlynol, er enghraifft: – darpariaeth fewnol – trefniadau partneriaeth neu ddulliau o gomisiynu o fewn ac ar draws sectorau – allanoli'r gwasanaeth i ddarparwr arall trwy ymddiriedolaeth neu drefniant arall – contractio'r gwasanaeth trwy broses dendro • Mae'r Cyngor yn ystyried costau a manteision yr opsiynau o safbwynt darbodaeth, effeithlonrwydd ac effeithiolrwydd – gan gynnwys dros y tymor byr, canolig a hir • Mae'r Cyngor yn cynnwys costau rheoli contract o fewn ei asesiad o opsiynau comisiynu • Mae'r Cyngor yn cynnwys asesiad o risg ar gyfer pob opsiwn comisiynu fel rhan o asesu costau a manteision • Mae'r Cyngor yn defnyddio amrywiaeth eang o wybodaeth o ffynonellau mewnol ac allanol i ddatblygu dealltwriaeth am y ffactorau cyfredol a hirdymor sy'n

		debygol o effeithio ar wasanaethau a gomisiynir
A yw'r Cyngor yn cynllunio dros raddfa amser briodol?	A yw'r Cyngor yn ystyried beth mae hirdymor yn ei olygu wrth gomisiynu gwasanaethau?	• Mae'r Cyngor yn ystyried beth mae hirdymor yn ei olygu wrth gynllunio ei ddull o gomisiynu gwasanaethau – h.y. pa mor bell ymlaen all/ddylai gynllunio a pham • Mae'r Cyngor yn ystyried sut y bydd yn taro cydbwysedd rhwng anghenion byrdymor a hirdymor wrth gynllunio ar gyfer comisiynu gwasanaethau gan gynnwys, er enghraifft, wrth bennu'r ffrâm amser ar gyfer contractau neu drefniadau comisiynu eraill
	A yw'r Cyngor yn deall y goblygiadau hirdymor o ran adnoddau wrth gomisiynu gwasanaethau?	• Mae'r Cyngor yn meddwl am yr adnoddau y bydd eu hangen arno dros y tymor canolig a hwy (costau oes gyfan) i ddarparu gwasanaethau a gomisiynir • Mae'r Cyngor yn ystyried sut y gellid gweithredu ystod o senarios lleihau cyllideb yn y dyfodol mewn perthynas â gwasanaethau a gomisiynir
	A yw'r Cyngor yn nodi sut y bydd yn monitro gwerth am arian gwasanaethau a gomisiynir dros y tymor byr, canolig a hir?	• Mae'r Cyngor yn nodi'r trefniadau monitro y bydd yn eu dilyn ar gyfer y gwasanaeth a gomisiynir • Dylai'r Cyngor ddisgrifio sut y bydd gwerth am arian gwasanaethau a gomisiynir yn cael ei asesu a'i fonitro gan gynnwys: – costau a manteision – cynnydd tuag at gerrig milltir a mesurau tymor byr, canolig a hwy
A yw'r Cyngor wedi meddwl am yr effeithiau ehangach y gallai ei wasanaeth a gomisiynir eu cael?	Wrth gomisiynu gwasanaethau, a yw'r Cyngor yn ystyried sut y gall gynyddu eu cyfraniad at amcanion llesiant y Cyngor i'r eithaf?	• Mae'r Cyngor yn ystyried sut y bydd gwasanaethau a gomisiynir yn effeithio ar ei holl amcanion llesiant ei hun i sicrhau manteision lluosog, osgoi dyblygu neu unrhyw ganlyniadau anfwriadol, e.e. ystyried amcanion tymor hwy, y gadwyn gyflenwi leol, cydnerthedd y farchnad ac effaith hyd contractau, bioamrywiaeth, a lleihau carbon
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at amcanion llesiant cyrff eraill yn y sector cyhoeddus i'r eithaf?	• Mae'r Cyngor yn ystyried sut y bydd gwasanaethau a gomisiynir yn effeithio ar amcanion llesiant cyrff eraill yn y sector cyhoeddus i sicrhau manteision lluosog ac osgoi dyblygu neu unrhyw ganlyniadau anfwriadol

	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at y Nodau Llesiant Cenedlaethol i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar y nodau llesiant cenedlaethol i sicrhau manteision lluosog ac osgoi dyblygu neu unrhyw ganlyniadau anfwriadol
A yw'r Cyngor yn gweithio gyda'r bobl a'r partneriaid iawn i ddylunio a darparu ei wasanaethau a gomisiynir?	A yw'r Cyngor wedi adnabod pwy y mae angen iddo eu cynnwys?	Mae'r Cyngor yn deall pwy fydd gwasanaethau a gomisiynir yn effeithio'n uniongyrchol ac yn anuniongyrchol arnynt. Goleuwyd hyn gan ddadansoddiad rhanddeiliaid neu ymarfer tebyg.
	A yw'r Cyngor yn cynnwys yr amrywiaeth lawn o bobl?	- Mae'r Cyngor yn cynnwys yr amrywiaeth lawn o safbwyntiau wrth benderfynu sut i gomisiynu gwasanaethau. - Mae'r Cyngor yn defnyddio canlyniadau gweithgarwch cynnwys i oleuo sut y bydd yn comisiynu gwasanaethau, gan gynnwys ei effaith ar grwpiau sy'n rhannu nodweddion gwarchodedig
	A yw'r Cyngor yn cydweithio gyda'r partneriaid cywir?	- Mae'r Cyngor yn deall yn dda pa bartneriaid a pha bartneriaid posibl y gallai weithio gyda hwy i gomisiynu gwasanaethau i wella gwerth am arian. Goleuwyd hyn gan ddadansoddiad cynhwysfawr o bartneriaid posibl a'u blaenoriaethau - Lle mae cyfleoedd i wella gwerth am arian trwy gomisiynu gwasanaethau mewn partneriaeth yn cael eu hadnabod, mae'r Cyngor yn mynd ar eu trywydd
A oes gan y Cyngor drefniadau i werthuso gwerth am arian ei ddull comisiynu?	A yw'r Cyngor yn mynd ati fel rhan o'r drefn arferol i werthuso effeithiolrwydd ei drefniadau comisiynu?	- Mae'r Cyngor yn adolygu effeithiolrwydd ei ddull comisiynu'n rheolaidd gan gynnwys: - i ba raddau y mae gwasanaethau a gomisiynir yn cyflawni'r amcanion y mae'r Cyngor wedi'u pennu - gwerth am arian modelau comisiynu a ddewiswyd gan gynnwys ystyried mewnbynnau, allbynnau a deilliannau
	A yw'r Cyngor yn mynd ati fel rhan o'r drefn arferol i rannu unrhyw wersi a ddysgwyd i oleuo ymarferion comisiynu yn y dyfodol?	Mae'r Cyngor yn rhannu ac yn cymhwyso unrhyw wersi a ddysgwyd o'i ddull comisiynu yn eang ar draws y sefydliad, a chyda phartneriaid lle y bo'n berthnasol.



Archwilio Cymru

1 Cwr y Ddinas

Caerdydd CF10 4BZ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: post@archwilio.cymru

Gwefan: www.archwilio.cymru

We welcome correspondence and telephone calls in Welsh and English.
Rydym yn croesawu gohebiaeth a galwadau ffôn yn Gymraeg a Saesneg.